

S'Isportellu de sa limba sarda, comente cale si siat isportellu de sas limbas de minoria, traballat pro sa valorizatzione, promotzione e tutela de su sardu cun atividades chi pertocant setores diferentes de sas amministratziones e entes pùblicos e de sas comunidades.

S'Isportellu de sa limba sarda de s'Unione de sos Comunes de su Barigadu est finantziadu dae sa Lege 482/1999 de s'Istadu e dae sa Regione Autònoma de Sardigna, gràtzias a unu progetu presentadu dae s'Unione de sos Comunes de su Barigadu, chi ponet paris sos Comunes de Ardaule, Bidoniu, Busache, Fordongianus, Neoneli, Nughedu Santa Itòria, Samugheo, Sorradile, Ula.

Ite est una limba de minoria?

Una limba de minoria est una limba faeddada dae una comunidade linguistica prus pitica in cunfrontu a sa comunidade intrea de cussa sotziedade o natzione.

Una limba de minoria no est sa limba ufiziale de un'istadu ma podet èssere reconnota e tutelada dae s'Istadu etotu.

In Itàlia sa limba ufiziale est s'italianu ma s'Istadu italianu tutelat unas cantas limba, diferentes dae s'italianu, chi sunt faeddadas in su territòriu natzionale. Prus che totu cun s'aplicatzione de sa Lege 482/99 *Normas in matèria de tutela de sas minorias linguisticas istòricas*, sa Repùblica Italiana conoschet comente de minoria - e ddas amparat - sas limbas faeddadas dae sas popolatziones *albanesas, catalanas, germànicas, grecas, islovena, croatas, su frantzesu, su francu-proventzale, su friulanu, su ladinu, s'otzitanu e su sardu*.

Ite faghet s'isportellu de sa limba sarda?

- Sa tradutziones in limba sarda de atos ufiziales comunales (Istatutu, delìberas e àteru ma su prus avisos e comunicatziones a sos tzitadinos).
- Sa trascritzione in sardu de sos topònimos (nùmenes de logu).
- Sa trascritzione de sos nùmenes de sos Ufizzios de su Comune e de àteros ufizzios pùblicos.
- Est a disponimentu de sos Ufizzios e de sos tzitadinos chi cherent impreare su sardu orale e iscritu, chi tèngiant bisòngiu de informatziones e consulèntzia.
- S'operadore de isportellu est a disponimentu fintzas de tzitadinos, maistros de iscola, professores, istudiantes e assòtzios pro cale si siat informatzione, aprofundimentu, duda, curiosidade, bibliografia, sitografia in contu de limba sarda, pro consulèntzias in sa carrera didàtica, in cussa giuridicu-normativa e pro cussìgios chi pertocant sas règulas de iscritura de su sardu.
- S'operadore de isportellu est a disponimentu de sos assòtzios pro pònnere in sardu programmas, manifestos, avisos e pro cale si siat consulèntzia linguistica.
- S'operadore de isportellu est a disponimentu de sas atividades cummerziales chi chèrgiant iscrìere in sardu sos cartellinos de sos produtos, avisos e inditos pro sos clientes, menù, publitzidade, cartellonìstica de cada genia de su locale e de s'atividade e àteru.

Pro ite est de importu chi s'Amministrazione Pùblica impreet su sardu?

S'impreu istituzionale de su sardu in s'Amministrazione Pùblica est de importu mannu pro dare dignidade a sa limba sarda, pro ddi connòschere su valore mannu chi tenet, pro no ispèrdere unu patrimoniu culturale e identitàriu chi non tenet prètziu e pro afortiare su profetu - fintzas individuale pro ogni persone – chi dat su bilinguismu.

Si s'Amministratzione Pùblica faeddat e iscriet in sardu ammustrat ca

- in sardu si podet comunicare comente in italianu e comente in cale si siat limba ufiziale;
- su sardu podet èssere impreadu in cale si siat cuntestu pùblicu e ufiziale, e non ebbia in familia e cun sos amigos;
- nessunu podet negare su diritu de impreare su sardu in cale si siat cuntestu, antzis, s'Istadu italianu tutelat custu sèberu;
- de sa limba sarda non si nde depimus birgongiare.

S'isportellu de sa limba sarda est unu servitziu chi sos Comunes de s'Unione de su Barigadu ponent a disponimentu de sos tzitadinos interessados e de sos ufizios de sos Comunes etotu.

Un'Amministratzione chi 'faeddat e iscriet' in sardu est unu modellu de importu pro sa limba sarda e pro sos sardos.

Un'Amministratzione e una bidda chi faeddant, paris cun sas àteras limbas, in sardu fintzas in **s'àmbitu turisticu**, oferit a sos istràngios sa possibilidade de connòschere mègius sa richesa de su patrimoniu culturale chi tenet cussa comunidade, chi no est ebbia de monumentos, òperas artìsticas, artigianadu, màndigos ma est àteru meda. E in prus, s'ammustrat s'atacamentu forte chi tenet cussa comunidade cun sas raighinas suas.

Normativa natzionale:

- Costituzione de sa Repùblica Italiana, 1948
- **Lege de su 15 de nadale 1999, n. 482, *Normas in matèria de tutela de sas minorias linguisticas***

Normativa regionale:

- Lege de su 15 de santugaine de su 1997, n. 26: "Promotzione e valorizatzione de sa cultura e de sa limba de sa Sardigna"

Normativa internatzionale:

- Decraratzione Universale de sos Diritos de s'Òmine, 1948
- Patu internatzionale in contu de diritos tziviles e polìticos ONU, 1966
- Decraratzione Onu subra sos diritos de sas minorias, 1992
- Progetu de decraratzione de sas Natziones Unidas subra a sas Persones indigenas, 1994
- Decraratzione subra sa Diversidade Culturale de s'UNESCO, 2001

Normativa europea:

- Atu finale de sa cunferèntzia in contu de sa Seguresa e Cooperatzione in Europa, Helsinki 1975
- Cunventzione Internatzionale subra sos Diritos de s'Infàntzia, 1989
- Carta Europea de sas limbas regionales o de minoria, 1992
- Cunferèntzia mundiale de sos diritos umanos - Decraratzione de Vienna e Programma de atzione, 1993
- Cunventzione CEI Tutela minorias, 1994
- Cunventzione cuadru pro sa protetzione de sas minorias natzionali - Consigiu de Europa, 1995

(MM)